



Nachtschwärmer
2009
20 Joor

Im Läggerli-Huus, fir 41 Stutz und 50 Rappe
Gits Läggerli in Drummle, mit Ziircher-Wappe
Au wenn sich Tout-Bâle driber beschwäärt
Numme soo isch das Wappe mol ebbis wäärt

Mir drey hogge, das isch frappant
In Kloote, am Nackt-Scanner, und waarte gspannt
Jetzt lauft si duure, d'Frau Borer Fielding
Aha, si het jo wiirgglig vvyll Ding

Alles wird dyyrer, das muess me schlugge
Sogar s'Bapyyr, zem Zeedel drugge
Doch uns drey macht das gaar kei Stress
Mir drugge uf Aggzie vo dr UBS

So billigi Zeedel, das isch s'Gröschte
Und UBS spaart Entsoorgigsköschte

Dr Charles isch 60, soo n'e Alte
So langsam kemme Runzle und Falte
Dergeege hilft, mir wisse wie
Muesch numme bitz an de Oore zie

Dr näggscht Uri Geller, das isch e Hit
Do mache au e baar Schwyzer mit
Es gääb no ain, wo mir super finde
Dää looht ganz dischgreet Milliaarde verschwinde

Piero, mir winsche Dir vvyll Verngniege
Wenn's im Container kracht und d'Fätze fliege
Du gwinnsch dert sicher, vo ganz elai
Muesch numme singe, denn flichte alli hai

E Iraker wirft, stoot im ene Bricht
Em Halbschueh Bush, e Schueh in's Gsicht
Das bringt dr Bush nid us dr Rueh
Är sait numme: ahaa, Fricker Schueh

Mit Pfyffe, Paugge und mit Drummle
Darfsch uffsmool nimm in Ziiri bummlle
Mit dääne wän mir uns nid stritte
Löönd aifach d'Wegger nimme am 6i litte

E Aschtronaute-Gritte, e zimligi Fläsche
Verliert im All iiri Wäärggzyygdäsche
Zem Gligg duet si numme so Zyyg verliere
Die Kataschtroofe, miesst si iire Shuttle yparggiere

Mit dääre Wäärggzyygkische, hösch digge
Ka me ändlig s'Ozoonloch fligge

S'Bundeshuus isch renoviert
Si händ gipst und gmoolt und betoniert
Jetz isch es fertig, mir händ das gseh
Jetz bruuchts dert jo gar kai Muurer meh

Es suecht e Buur, und sini Sau
Am Fäärnsee nach ere liebe Frau
Är findet aini, gar nid schyter
Si verliebt sich in d'Sau, und äär suecht wyter

www.nachtschwaermer.ch